



29 Julai 2016
29 July 2016
P.U. (A) 216

WARTA KERAJAAN PERSEKUTUAN

FEDERAL GOVERNMENT GAZETTE

KAEDAH-KAEDAH KUMPULAN WANG SIMPANAN PEKERJA (AKAUN SIMPANAN SHARIAH) 2016

EMPLOYEES PROVIDENT FUND (SIMPANAN SHARIAH ACCOUNT) RULES 2016



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA KUMPULAN WANG SIMPANAN PEKERJA 1991

KAEDAH-KAEDAH KUMPULAN WANG SIMPANAN PEKERJA
(AKAUN SIMPANAN SHARIAH) 2016

PADA menjalankan kuasa yang diberikan oleh perenggan 73(*da*) Akta Kumpulan Wang Simpanan Pekerja 1991 [*Akta 452*], Lembaga membuat kaedah-kaedah yang berikut:

Nama dan permulaan kuat kuasa

1. (1) Kaedah-kaedah ini bolehlah dinamakan **Kaedah-Kaedah Kumpulan Wang Simpanan Pekerja (Akaun Simpanan Syariah) 2016**.

(2) Kaedah-Kaedah ini mula berkuat kuasa pada 1 Ogos 2016.

Tafsiran

2. Dalam Kaedah-Kaedah ini, melainkan jika konteksnya menghendaki makna yang lain—

“akaun Simpanan Syariah” ertinya akaun ahli Kumpulan Wang yang diuruskan mengikut Syariah menurut seksyen 43A Akta;

“Jawatankuasa Penasihat Syariah” ertinya Jawatankuasa Penasihat Syariah yang ditubuhkan di bawah seksyen 23A Akta;

“pemilihan” ertinya pemilihan untuk akaun seorang ahli Kumpulan Wang diuruskan mengikut Syariah di bawah subseksyen 43A(1) Akta.

Pewujudan rangka kerja patuh Syariah

3. Akaun Simpanan Syariah hendaklah diuruskan mengikut rangka kerja patuh Syariah berkenaan dengan operasi dan pelaburan akaun Simpanan Syariah yang diwujudkan oleh Lembaga seperti yang berikut:

- (a) penjalanan kajian Shariah dan pemberian nasihat Shariah;
- (b) pengurusan risiko ketidakpatuhan Shariah bagi maksud mengurangkan apa-apa kemungkinan berlakunya ketidakpatuhan Shariah;
- (c) pemantauan dan semakan pematuhan Shariah bagi maksud penilaian berterusan ke atas tahap pematuhan Shariah; dan
- (d) pengauditan Shariah bagi maksud penilaian berkala bebas dan jaminan objektif ke atas tahap pematuhan Shariah.

Terma dan syarat pemilihan

4. Pemilihan adalah tertakluk kepada terma dan syarat yang berikut:

- (a) ahli Kumpulan Wang bersetuju untuk melantik Lembaga sebagai ejen dan pemegang amanah untuk menguruskan dan melaburkan kesemua amaun yang ada pada kredit akaunnya mengikut Shariah;
- (b) ahli Kumpulan Wang itu menandatangani akad iaitu dokumen yang menyatakan persetujuannya bagi akaunnya diuruskan oleh Lembaga berdasarkan konsep *wakalah*; dan
- (c) kesemua amaun yang ada pada kredit akaun ahli Kumpulan Wang itu hendaklah mula diuruskan mengikut Shariah pada tarikh kuat kuasa pemilihan.

Tatacara pemilihan

5. (1) Mana-mana ahli Kumpulan Wang yang berniat untuk membuat pemilihan hendaklah hadir di mana-mana pejabat Lembaga atau di mana-mana tempat lain sebagaimana yang ditetapkan oleh Lembaga untuk membuat pemilihan.

(2) Apabila membuat pemilihan di bawah subkaedah (1), ahli Kumpulan Wang itu hendaklah mengemukakan dokumen pengenالannya.

Pembatalan pemilihan

6. (1) Tertakluk kepada subseksyen 43A(4) Akta, seorang ahli Kumpulan Wang yang berniat untuk membatalkan pilihannya hendaklah hadir di mana-mana pejabat Lembaga atau di mana-mana tempat lain sebagaimana yang ditetapkan oleh Lembaga untuk membuat pembatalan pemilihan itu.

(2) Apabila membuat pembatalan pemilihan di bawah subkaedah (1), ahli Kumpulan Wang itu hendaklah mengemukakan dokumen pengenالannya.

(3) Pembatalan pemilihan di bawah subkaedah (1) mula berkuat kuasa sebaik selepas notis pembatalan yang ditandatangani oleh ahli Kumpulan Wang diterima oleh Lembaga, tanpa menjejaskan hak ahli Kumpulan Wang itu untuk membuat pemilihan baharu.

Pelaburan di bawah seksyen 29A Akta

7. (1) Seorang ahli Kumpulan Wang yang pilihannya telah berkuat kuasa yang berniat untuk membuat pelaburan di bawah seksyen 29A Akta hendaklah membuat pelaburan hanya dalam pelaburan patuh Syariah mengikut garis panduan yang ditentukan oleh Jawatankuasa Penasihat Syariah.

(2) Suatu pelaburan yang dibuat oleh ahli Kumpulan Wang di bawah seksyen 29A Akta sebelum tarikh kuat kuasa pemilihan tidak diwajibkan untuk ditukar kepada pelaburan patuh Syariah, atau dicairkan atau ditebus.

Dividen bagi pembayaran caruman lewat, dsb.

8. (1) Sekiranya berlaku pembayaran caruman lewat oleh seseorang majikan dalam mana-mana tahun kewangan berkenaan dengan akaun Simpanan Syariah, dividen yang kena dikreditkan ke atas caruman itu hendaklah berdasarkan pada—

(a) dividen yang diisytiharkan oleh Lembaga di bawah perenggan 27(1)(b) Akta bagi tahun kewangan caruman itu tertunggak; atau

- (b) jika tiada dividen diisytiharkan oleh Lembaga di bawah perenggan 27(1)(b) Akta bagi tahun kewangan caruman itu tertunggak, apa-apa dividen yang diisytiharkan oleh Lembaga bagi tahun kewangan caruman itu tertunggak.

(2) Dalam apa-apa keadaan yang membawa kepada penyelarasan, pelarasan atau pengembalian caruman berkenaan dengan akaun Simpanan Shariah, dividen yang kena dikreditkan ke atas caruman itu hendaklah berdasarkan pada—

- (a) dividen yang diisytiharkan oleh Lembaga di bawah perenggan 27(1)(b) Akta bagi setiap tahun sepanjang tempoh penyelarasan atau pelarasan caruman itu kena dibuat sehingga penyelarasan atau pelarasan caruman itu dibuat atau bagi setiap tahun sepanjang tempoh pengembalian caruman itu kena dibayar sehingga pengembalian caruman itu dibayar; atau
- (b) jika tiada dividen yang diisytiharkan oleh Lembaga di bawah perenggan 27(1)(b) Akta bagi mana-mana tahun sepanjang tempoh penyelarasan atau pelarasan caruman itu dibuat atau pengembalian caruman itu dibayar, apa-apa dividen yang diisytiharkan oleh Lembaga bagi setiap tahun sepanjang tempoh penyelarasan atau pelarasan caruman itu kena dibuat sehingga penyelarasan atau pelarasan caruman itu dibuat atau bagi setiap tahun sepanjang tempoh pengembalian caruman itu kena dibayar sehingga pengembalian caruman itu dibayar.

Penyatuan akaun

9. (1) Selepas pemilihan di bawah subseksyen 43A(1) Akta dibuat oleh ahli Kumpulan Wang dan didapati bahawa ahli Kumpulan Wang itu mempunyai lebih daripada satu akaun dengan Kumpulan Wang, semua akaunnya hendaklah disatukan.